

TE PARE TIAIRAA

E FAAITE RA I TE FAATERERAA ARII A IEHOVA

Te tâu'a mai ra
anei te Atua
ia oe?



TAPURA TUMU PARAU

- 3 “No te aha aita te Atua i ohipa 'i?”
- 4 Te ite ra anei te Atua ia oe?
- 6 Te taa ra anei te Atua ia oe?
- 8 Te faatupu ra anei te Atua i te aumihi?
- 10 Te mauui: E faautuaraa anei te reira no ô mai i te Atua?
- 12 O vai te tano ia faahapahia no te mau mauui atoa?
- 13 Fatata te Atua i te faaore roa i te mau mauui atoa
- 14 E faufaahia oe a ite ai e te tâu'a ra te Atua ia oe
- 16 Eaha to te Atua huru a mauui ai oe?

I nia i te hoho'a o te api matamua, te vai ra te hoê taata o te horo ê ra i te ati natura

TE TÂU'A MAI RA ANEI TE ATUA IA OE?

Ia tupu te ati aore ra ia mauui e ia pohe te taata, te ui nei paha tatou e te ite aore ra te tâu'a mai ra anei te Atua i te reira. Te na ô ra te Bibilia:

“Tei nia iho hoi te mata o lehova i te feia parau-tia, e te faaroo ra to 'na tari'a i ta ratou taparuparuraa, te patoi nei râ lehova i te feia e rave ra i te mau mea ino.”—Petero 1, 3:12.

Te faaite ra teie vea *Te Pare Tiairaa* e nafea te Atua e tauturu ai ia tatou e eaha ta 'na e rave ra no te faaore i te mau mauui atoa.

TE PARE TIARAA
E FAATE RA I TE FAATERERAA ARII A IHOVA

Vol. 139, No. 11 2018 TAHITIAN
Neneiraa o te numera taitahi: 69 804 000
Na roto 337 REO

TE FAAHANAHANA ra te vea *Te Pare Tiairaa* i te Atua ra o lehova, te Arii o te ao taatoa. E tamahanahana atoa i te taata na roto i te parau api oaoa fatata te Faatere-raa arii a te Atua i te ra'i i te faaore i te ino atoa e te faairi i te fenua ei paradaiso. E faaitoito atoa te reira ia faatupu i te faaroo ia Iesu Mesia tei pohe ia nehenehe taitou e fana'o i te ora mure ore. Te faatere nei oia ei Arii o te Faatereeraa arii a te Atua. Mai 1879 mai te piaraahia teie vea e e ere i te papai poritita. O te mana'o o te Bibilia tei haafauaahia i roto.

The Watchtower (ISSN 0043-1087)
Issue 11 September/October 2018 is published by Watchtower Bible and Tract Society of New York, Inc.; L. Weaver, Jr., President; G. F. Simonis, Secretary-Treasurer; 1000 Red Mills Road, Walkkill, NY 12589-3299.
© 2018 Watch Tower Bible and Tract Society of Pennsylvania. Printed in Japan.

TAHITI (POLYNÉSIE FRANÇAISE):
Association Les Témoins de Jéhovah
BP 7715
98719 Taravao

NOUVELLE-CALÉDONIE:
Association Les Témoins de Jéhovah
BP 1741
98874 Pont des Français

No te ite i te tahi atu mau vahi nohooa, a hi'o i nia www.jw.org/ty/fareire-ia-matou.



E hinaaro anei oe e ite atu â aore ra te hoê haapiiraa Bibilia tamoni ore?

A hi'o i nia www.jw.org/ty

aore ra a haponu mai i ta oe parau aniraa.

E ere teie papai i te mea hoo. E tuhaa te reira no te hoê ohipa haapiiraa Bibilia na te ao atoa nei e turuhia ra e te mau ô horoa noa. No te mau ô horoa noa, a hi'o i nia www.jw.org/ty. Aita ana'e i faahitihia te huriraa Bibilia, no roto mai ia te mau irava o te mau Papai Hebera, mai te Genese e tae atu i te Malaki, i *Te Bibilia Mo'a ra* ma te tahi mau faatanoraa i te papai o te tahi mau ta'o, e te mau irava o te mau Papai Heleni, mai te Mataio e tae atu i te Apokalupo, no roto mai ia i te *Huriraa o te ao api o te mau Papai Heleni Kerisetiano*.

“NO TE AHA AITA TE ATUA I OHIPA 'I?”



“UA TAMAU VAU I TE UI: NO TE AHA AITA TE ATUA I OHIPA 'I?”

— Te Pāpa Benoît XVI,
i te hoê tere mataitairaa
i te aua haavíraa tahito i
Auschwitz i Poronia.

A TUPU AI TE ATI, UA UI A'ENA ANEI OE: “NO TE AHA AITA TE ATUA I OHIPA 'I?” AORE RA UA TUPU A'ENA ANEI TE HOÊ ATI I ROTO I TO OE ORARAA A UI ATU AI TE HAAPAO RA ANEI TE ATUA IA OE IHO?

Peneia'e e tu to oe mana'o e to Sheila tei ora i te Hau Amui. Ua paari oia i roto i te hoê utuafare faaroo. Ua parau oia: “Mai to 'u nainairaa, ua haapii au no nia i te Atua no te mea oia to tatou Atua poiete. Teie râ, aita roa 'tu vau i faatupu i te auhoaraa piri e o 'na. No 'u, te hi'o ra oia ia 'u, na te atea noa râ. Aita vau i mana'o e te riri ra te Atua ia 'u. Aita atoa râ vau i tiaturi e te tâu'a mai ra oia ia 'u.” No te aha e ere i te mea papu no Sheila e te here ra te Atua ia 'na? Te faataa ra oia: “Ua faaruru to 'u utuafare e rave rahi ati e e au ra e aita te Atua i tauturu a'e ia tatou.”

Mai ia Sheila, mea papu paha ia oe e te vai ra te hoê Atua Mana hope. Tera râ, te ui ra paha oe te haapao mai ra anei oia ia **oe**. Hoê â uiraa to te taata parau-tia o Ioba, tei faatupu i te faaroo i te puai e te paari o te Atua poiete. (Ioba 2:3; 9:4) Ua faaruru o Ioba hoê ati i muri i te tahi e e au ra e aita te reira e mou. Ua ani oia i te Atua: “Eaha hoi oe i huna 'i i to mata, e i haapao mai ai oe ia 'u ei enemi no oe?”—Ioba 13:24.

Eaha ta te Bibilia e parau ra? O te Atua anei te mea tano ia faahapahia no to tatou mau fifi? Te vai ra anei te mau haapapuraa e te tâu'a ra te Atua i te mau taata atoa e ia tatou taitahi? E nehenehe anei tatou taitahi e ite te haapao ra anei te Atua ia tatou, te taa ra anei o 'na i to tatou huru mau e te tauturu ra anei oia ia tatou i mua i te fifi?

I to muri nei mau tumu parau, e hi'opoa tatou eaha ta te poieteraa e haapii mai ra no nia i te huru o te Atua i nia ia tatou. (Roma 1:20) I muri iho, e hi'o tatou eaha ta te Bibilia e parau ra no nia i te reira. Hau atu oe e ite ai “o vai o 'na” maoti ta 'na i poiete e ta 'na Parau, hau atu oe e papu ai e “te tâu'a mai ra oia” ia oe.—Ioane 1, 2:3; Petero 1, 5:7.

Te ite ra anei te Atua ia oe?

TA TATOU E HAAPII MAI RA MAOTI TE POIETERAA

Mea faufaa roa na 60 minuti matamua o te hoê aiû tei fanau-noa-hia 'tura. No te aha? No te mea i taua taime fifi no te aiû, e faatupu te metua vahine i te hoê niu e te pêpe. Maoti te reira e paari maitai atu â 'i ta 'na tamarii.*

Eaha te turai i te hoê metua vahine ia haapao i ta 'na aiû ma te here? Te faataa ra te aivanaa o Jeannette Crenshaw i roto i te hoê vea e rahi mai te oromona parauhia *oxytocine* “o te haapuai i te huru aau o te metua vahine i muri a'e i te fanauraa a tapea 'i oia i ta 'na aiû, a hi'o ai oia ia 'na e a horoa 'tu ai i to 'na û.” (*The Journal of Perinatal Education*) Te vai atoa ra te tahi atu oromona i taua taime ra o te “tauturu i te metua vahine ia ite eaha te rave” e o te haapuai i te niu ta 'na e faatupu ra e te aiû. No te aha mea faufaa ia ite i te reira?

Ua poiete to tatou Atua i i te here o Iehova[#] i te metua vahine ia nehenehe oia e faatupu i tera niu e ta 'na aiû. Ua haapao te arii Davida e na te Atua

* Te vai ra vetahi mau metua vahine o te hepohepo rahi ra i muri noa mai i te fanauraa. Mea fifi no ratou ia faatupu i te niu e ta ratou aiû. Eiaha râ e mana'o e o ratou te tumu o tera fifi. Ia au i te faanahoraa i Marite no nia i te ea i te pae feruriraa, ua riro te hepohepo rahi i muri noa mai i te fanauraa “ei faahopearaa o e rave rahi tumu i te pae o te ea e o te mau huru aau. Aita râ te reira e tupu no te mea ua rave te metua vahine i te hoê ohipa aore ra aita.” No te ite atu â, a hi'o i te tumu parau “No te ite eaha te hepohepo rahi i muri noa mai i te fanauraa” o te vea *A ara mai na!* o te 8 no Tiu-nu 2003 (Farani).

[#] O Iehova to te Atua i'oa i roto i te Bibilia.—Salamo 83:18.



i rave ia 'na “mai roto i te opu” e i tamahanahana ia 'na i roto i te rima o to 'na metua vahine. Ua pure oia: “Ua tuuhia 'tu vau ia oe mai tau fanauraa mai â; o tau Atua hoi oe mai te opu mai â o tau metua vahine.”—Salamo 22:9, 10.

A FERURI NA: Mai te peu ua poiete te Atua i teie faanahoraa i i te paari ia papu ia 'na e haapao te hoê metua vahine i ta 'na aiû ma te here e e horoa oia i ta te aiû e hinaaro mau ra, mea papu ia e te tâu'a ra te Atua ia tatou, te ‘tamarii na te Atua,’ e ere anei?—Ohipa 17:29.

TA TE BIBILIA E HAAPII MAI RA NO NIA I TO TE ATUA TÂU'ARAA IA TATOU

Ua ite maitai a'e Iesu Mesia o vai te Atua poiete e ua haapii atu oia: “E piti manu rii te hoohia i te hoê noa moni veo, e ere anei? Ia mairi noa 'tu râ hoê o ratou i raro, e ite iho â to outou Metua i te reira. Ua taio-pauroa-atoa-hia te rouru o to outou upoo. Eiaha ia e mätä'u. Mea faufaa a'e outou i te manu rii e rave rahi.”—Mataio 10:29-31.

Mea iti i rotopu ia tatou o te tâu'a ra i te manu rii taitahi, mea iti atu â ia tei tapao e ua ‘mairi hoê o ratou i raro.’ Ua ite râ i to tatou Metua i te ra 'i i te manu rii **taithahi!** No 'na, mea faufaa a'e te hoê taata i te mau manu, noa 'tu e **rave rahi** manu. Mea papu ia te haapiiraa ta tatou e huti mai: “Eiaha ia e mätä'u,” te tâu'a iho â ra te Atua ia oe. Te haapao maite ra oia ia oe!



“Mea faufaa a’e outou.”—MATAIO 10:31

Te haapapu mai ra te Bibilia

- “Tei te mau vahi atoa nei to lehova mata, i te hi’oraa mai i te ino e te maitai.”—**MASELI 15:3.**
- “Tei te feia parau-tia ra to lehova mata; e tei ta ratou pure to ’na tari’a.”—**SALAMO 34:15.**
- “E oaoa vau, e mauruuru vau i to oe ra aroha; i hi’o na hoi oe i to ’u atiraa, e ua ite mai oe i tau varua i te mau ati no ’u nei.”—**SALAMO 31:7.**

Te haapao mau nei te Atua i to tatou maitai e te tâu’a ra oia ia tatou ma te here

“UA MANA’O VAU AITA IEHOVA E HERE RA IA ’U”

E tau anei to tatou oraraa mai te peu e ite tatou te haapao mau nei te Atua i to tatou maitai e te tâu’a ra oia ia tatou ma te here? Papu maitai e. O ta **Hannah,* no te fenua Beretane** i faataa:

“E rave rahi taime, ua mana’o vau aita lehova e here ra ia ’u e aita oia e pahono i ta ’u mau pure. No te mea paha ua ere au i te faaroo. Ua mana’o vau e te faautua ra aore ra te tâu’a ore ra te Atua ia ’u no te mea mea faufaa ore au. E au ra e aita te Atua i tâu’a a’e ia ’u.”

I teie nei râ, aita roa ’tu Hannah e feaa ra no nia i to lehova here e to ’na tâu’araa ia ’na. No te aha oia i tau ai i to ’na mana’o? Te faataa ra oia: “Ua tau mārû mai au i to ’u mana’o. Ua haamana’o vau i te hoê oreroraa parau Bibilia vauvauhia e rave rahi matahiti i teie nei no nia i te tusia taraehara o Iesu. Ua putapû roa to ’u aau i tera oreroraa parau e ua tauturu mai te reira ia ore e feaa no nia i to lehova here. E ia pahonohia ta ’u mau pure, pinepine au i te ta’i no te mea te taa ra ia ’u e te here mau ra lehova ia ’u. Hau atu, maoti te haapiiraa i te Bibilia e te haereraa i te mau putuputuraa Kerisetiano, ua haapii atu â vau no nia ia lehova, to ’na huru mau e to ’na mana’o no nia ia tatou. I teie nei, mea papu ia ’u e te tauturu e te here ra lehova ia tatou pauroa. Te hinaaro atoa oia e haapao ia tatou taitahi.”

E mau parau faaitoito mau ta Hannah i faahiti, e ere anei? Eaha râ te haapapu mai nei e te taa e te haamana’o ra te Atua i to oe mau huru aau? E pahonohia mai teie uiraa i roto i to muri iho tumu parau.

* Ua tauhia te tahi mau i’oa i roto i teie tumu parau.


Te taa ra anei te Atua ia oe?

TA TATOU E HAAPII MAI RA MAOTI TE POIETERAA

A feruri na i nia i te hoê o te mau taairaa piri roa 'e e vai ra i rotopu i te mau taata: te taairaa i rotopu i na maehaa mau. Mea piri roa raua. Ia au i te faatere rahi o te hoê pu maimiraa no nia i te mau maehaa, o Nancy Segal to 'na i'oa e e maehaa atoa oia, e nehenehe vetahi maehaa "e faahiti i te hoê mana'o i te tahi atu e ua taa maitai ia 'na i te reira noa 'tu aita i faataahia 'tu." Ua parau te hoê vahine eaha te huru taairaa e vai ra i rotopu ia 'na e to 'na tuahine maehaa mau: "Ua ite maitai maua ia maua."

No te aha mea taa maitai ia raua i to raua huru mau? Ia au i te tahi mau hi'opoaraa, e tauturu mai to raua huru tupuraa e to raua na metua. Hau atu, hoê â ihi tapao tupuna to na maehaa mau. E au ra e na te reira e tauturu roa 'tu ia raua ia taa i to raua huru mau.

A FERURI NA: Inaha ua poiete te Atua i teie ihi tapao tupuna faahiahia mau, papu maitai ua taa ia 'na i te huru mau o te taata taitahi. Tera hoi ta te papai salamo o Davida i faataa: "Na oe i tapo'i ia 'u i roto i te opu o tau metua vahine ra. To 'u nei huru, aore ia i moe ia oe, a hamanihia 'i au i te vahi moe ra. . . . Ua ite to mata ia 'u i to 'u vai-oti-ore-raa ra; e ua oti to 'u mau melo atoa ra i te papaihia i roto i te buka na oe." (Salamo 139:13, 15, 16) O



te Atua ana'e o te ite ra e o te taa maitai ra eiaha noa i to tatou ihi tapao tupuna, oia atoa i te mau huru tupuraa atoa o te oraraa tei ohipa i nia i to tatou huru taata. Te haapapu ra te reira e te taa maitai ra te Atua ia tatou i roto i te mau tuhaa rii atoa o to tatou oraraa.

TA TE BIBILIA E HAAPII MAI RA NO NIA I TO TE ATUA TAARAA IA TATOU

Ua pure o Davida: "E Iehova, ua hi'opoahia vau e oe e ua itea: ua ite oe i tau parahiraa i raro e tau tiaraa i nia; ua ite oe i to 'u nei mana'o i te atea ê ra. E aita roa e parau o roto i tau vaha i toe i te iteahua-hia e oe, e Iehova." (Salamo 139:1, 2, 4) Hau atu, te ite ra Iehova i to tatou mau huru aau hohonu roa 'e e "te ite ra oia i te mau mana'o atoa." (Paraleipomeno 1, 28:9; Samuela 1, 16:6, 7) Eaha ta teie mau irava e faaite ra no nia i te Atua?

Aita paha tatou e ite e nafea ia faaite i to tatou mau mana'o e huru aau atoa na roto i te pure. Te haapao nei râ te Atua poiete eiaha noa i te **ohipa** ta tatou e rave ra, te taa atoa ra oia **no te aha** tatou e na reira 'i. Hau atu, te taa ra oia e **te hinaaro** ra tatou e **rave** i te mea maitai, noa 'tu aita tatou e manu'a ra no to tatou mau taotiaraa. Ua poiete te Atua ia tatou ia nehenehe tatou e haafaufaa i te here i roto i to tatou aau. Papu maitai ia te hinaaro rahi ra te Atua e ite e e taa i to tatou mau mana'o e hinaaro mau i te here.—Ioane 1, 4:7-10.



“Ua ite to mata ia ’u i to ’u vai-oti-ore-raa ra.”
—SALAMO 139:16.

Te haapapu mai ra te Bibilia

- “Tei nia iho hoi te mata o lehova i te feia parau-tia, e te faaroo ra to ’na tari’a i ta ratou taparuparuraa.”—PETERO 1, 3:12.
- Te fafau ra te Atua: “E haapii atu vau ia oe, e faaite au ia oe i ta oe e’a ia haere ra; e a’o atu vau ia oe, e ei nia ia oe tau mata vai ai.”—SALAMO 32:8.

Te ite ra te Atua i te mau ohipa atoa. Ua ite atoa oia i to tatou mauui noa ’tu aita vetahi ê e ite ra aore ra e taa maitai ra i te reira

MEA AUMAIUI MAU TE ATUA

A ite ai e te taa ra te Atua i to tatou huru tupuraa e huru aau, te tauturu ra anei te reira ia tatou ia faaruru i te mau fifi? A hi’o na i tei tupu no **Anna, no te fenua Nigéria**. Te faataa ra oia: “Ua ui au mea faufaa anei te oraraa inaha mea ino mau te mau tupuraa ta ’u i faaruru. E vahine ivi au e te haapao ra vau i ta ’u tamahine iti. Ua tapeahia oia i te fare ma’i no te mea mea rahi te pape i roto i to ’na roro. I tera taime atoa i itehia ’i e ma’i mariri ai taata to ’u. Ua titauhia ia tâpûhia vau e ia rapaauhia e te raau e te hihi. Ua mauui roa vau no te mea tei te fare ma’i au, oia atoa ta ’u tamahine iti tei ma’ihia.”

Eaha tei tauturu ia Anna ia faaruru i te reira? Te pahono ra oia: “Ua feruriruri au i nia i te mau irava Bibilia mai te Philipi 4:6, 7 o te faaite ra e ’na te hau o te Atua, tei hau ê i te mau mana’o atoa, e tia i to outou aau e feruriraa.’ I te taime atoa e feruri ai au i nia i tera irava, e piri atu â vau ia lehova. Mea papu ia ’u e te taa maitai ra oia ia ’u. Ua fana’o atoa vau e rave rahi faaitoitoraa no ô mai i ta ’u mau taae e tuahine here o ta ’u amuiraa Kerisetiano.”

“Noa ’tu te faaruru noa â ra vau i to ’u ma’i, ua maitai mai au e ta ’u tamahine. Inaha tei to tatou pae o lehova, ua haapii maua ta ’u tamahine ia ore ia mana’o ino i mua i te mau tupuraa fifi mau. Te haapapu mai ra te lakobo 5:11: ‘Te parau nei matou e ia oaoa te feia tei faaoromai tamau. Ua faaroo outou i te faaoromai tamau o loba e ua ite outou i ta lehova i rave e e Atua here [aore ra “aumaiui,” nota i raro a’e i te api] rahi lehova e te aroha hama-ni maitai.’” Ua taa maitai ia lehova i te huru tupuraa o loba. Papu maitai te taa atoa ra oia i te mau fifi atoa ta tatou e faaruru ra.

Te faatupu ra anei te Atua i te aumihi?



TA TATOU E HAAPII MAI RA MAOTI TE POIETERAA

Te aumihi, o te aravihi iā ia taa i te huru aau aore ra huru tupuraa o te hoē taata ma te feruri ahiri o tatou tera e faaruru ra hoē ā tupuraa. Ua parau te hoē taote i te pae o te feruriraa, o Rick Hanson to 'na i'oa: "Ua fanauhia tatou e te aravihi ia faaite i te aumihi ia vetahi ê."

A FERURI NA: No te aha o tatou ana'e te nehenehe e faaite i te aumihi e aita i itehia tera huru aau i rotopu i te tahi atu mau poieteraa? Te faataa ra te Bibilia e ua poiete te Atua i te taata ia au i to 'na iho huru. (Genese 1:26) E nehenehe hoi tatou e pee i to te Atua huru e e rave i te maraa ra ia tatou no te faatupu hoē ā mau huru maitatai e to 'na. No reira, ia faatupu te taata i te aumihi ma te tauturu ia vetahi ê, te pee ra oia i te aumihi o to 'na Atua poiete i i te aroha, o Iehova.—Maseli 14:31.

TA TE BIBILIA E HAAPII MAI RA NO NIA I TO TE ATUA AUMIHI

Te taa ra te Atua i to tatou huru mau e mea riri na 'na ia ite e te mauui ra tatou. Te parau ra te Bibilia no nia i te nunaa Iseraela i tahito, tei faaruru i te faatitiraa ino a to Aiphiti e te tereraa fifi mau i roto i te medebara 40 matahiti i te maoro: "Ua haapao maira oia i to ratou ati, ia ite oia i to ratou pii." (Salamo 106:44) A tapao na aita te Atua i ite

noa i to ratou fifi. Ua mauui atoa oia no ratou. Ua parau oia: "Ua ite hoi au i to ratou oto." (Exodo 3:7) Te na ô ra te Atua: "O te faatiaia 'tu ia outou ra, ua faatiaia iā i tana orio mata nei." (Zekaria 2:8) Ia haamauiui vetahi ia tatou, e mauui to tatou aau, oia atoa to te Atua.

Te haapapu mai ra te Bibilia e noa 'tu no tatou mea ino tatou e eita e tano ia fana'o tatou i te aumihi o te Atua, "mea rahi a'e te Atua i to tatou aau e ua ite o 'na i te mau mea atoa." (Ioane 1, 3:19, 20) Mea ite maitai a'e te Atua o vai mau na tatou. Ua taa maitai ia 'na to tatou mau huru tupuraa atoa, to tatou mau mana'o e huru aau. Te faatupu ra oia i te aumihi ia tatou.

E nehenehe tatou e tiaturi
ia Iehova no te fana'o i te ta-
mahanahanaraa, te a'oraa i
te paari e te turu, papu maitai
hoi te tauturu nei oia i te feia
o te faaruru ra i te ati



Te haapapu mai ra te Bibilia

- “E parau oe i reira, e na lehova e parau mai; na oe e tiaoro, e na ’na e parau mai e, Inaha, teie Au!”—ISAIA 58:9.
- “Ua ite hoi au i te opua ta ’u i opua ia outou nei, te parau maira lehova. E opuaraa hau ia, e ere i to te ino; ia horoa ’tu vau i ta outou i tiaturi ra, i to outou hopea. E riro outou i te tiaoro mai ia ’u, e haere hoi outou e pure mai ia ’u, e na ’u e faaroo atu ia outou.”—IEREMIA 29:11, 12.
- “A tuu na oe i to ’u nei roimata i roto i ta oe ra farii: aita anei i roto atoa i ta oe ra parau?”—SALAMO 56:8.

TE ITE, TE TAA E TE TÂU’A RA TE ATUA IA TATOU

A ite ai te faatupu ra te Atua i te aumihi ia tatou, te tauturu ra anei te reira ia tatou ia faaruru i te fifi? A hi’o na i ta **Maria** i faaruru:

“Ua pohe ta ’u tamaiti e 18 matahiti to ’na i muri a’e i to ’na faaoromairaa i te ma’i mariri ai taata e piti matahiti i te maoro. I muri a’e i tera tupuraa mauui mau, ua mana’o vau e mea fifi e mea tano ore te oraraa. Ua riri roa vau ia lehova no te mea aita oia i ohipa no te faaora ia ’na!”

“E ono matahiti i muri iho, ua farerei au i te hoê hoa i te here e te aroha o te amuiraa e ua faaroo maitai oia ia ’u a faaite atu ai au e no ’u aita lehova e here ra ia ’u. Ua faaroo oia ia ’u e rave rahi hora ma te ore e paraparau. I muri iho, ua faahiti oia i te hoê irava Bibilia tei haaputapû i to ’u aau. O te loane 1, 3:19, 20 o te parau ra: ‘E rahi te Atua i to tatou aau, e ua ite oia i te mau mea atoa nei.’ Ua faataa mai oia e te taa ra lehova i te mau ati ta tatou e faaruru ra.”

“Noa ’tu râ, mea fifi noa â no ’u ia faaore i to ’u riri! Taio atura vau i te Salamo 94:19 o te parau ra: ‘I rotopu i to ’u nei mana’o tapitapi i roto ia ’u nei, na to haamahanahana e faaoaoa mai i tau varua.’ E au ra e ua papaihia teie irava no ’u! I muri iho, ua oaoa vau no te mea ua nehenehe au e paraparau ia lehova no nia i to ’u ati e ua papu ia ’u te faaroo e te taa ra oia ia ’u.”

Mea tamahanahana mau ia ite e te taa e te tâu’a ra te Atua ia tatou, e ere anei? No te aha râ e rave rahi tupuraa mauui mau? No te mea anei te faautua ra te Atua ia tatou no to tatou mau hara? E ohipa anei te Atua no te faaore roa i te mau mauui atoa? E pahonohia teie mau uiraa i roto i to muri mai mau tumu parau.

TE MAUIUI

E faautuaraa anei te reira no ô mai i te Atua?

MEA PARUPARU TE AVAE AUI O LUZIA. Ei tamarii, ua roohia oia i te hoê ma'i pee o te haafifi i te faanahoraa uaua uira o te tino. I te 16raa o to 'na matahiti, ua parau te paoti ohipa a Luzia e ua faautua te Atua ia 'na ma te faaohipa i tera ma'i no te mea aita oia i faaroo i to 'na metua vahine e ua rave oia i te ino. Tau matahiti i muri a'e, te haamana'o noa â ra o Luzia e ua mauui roa oia no ta 'na i parau.

UA PARAUHIA IA DAMARIS E MA'I MARIRI AI TAA-TA TO 'NA e ua ani atu to 'na metua tane: "Eaha ta oe i rave a roohia 'tu ai oe i tera ma'i? Papu maitai ua rave oe i te ino. No reira te Atua e faautua 'i ia oe." Ua oti roa o Damaris no tera parau.

Te mana'o ra te taata ua riro te ma'i ei faautuaraa no ô mai i te Atua. E ere tera mana'o no teie nei. Ia au i te buka *Tutuu e peu tumu i te mau fenua o te Bibilia* (Beretane), e rave rahi i te tau o te Mesia tei tiaturi e "e tupu te ma'i no te mea ua hara te taata ma'i aore ra hoê o to 'na mau fetii e ua riro te ma'i ei faautuaraa no tera hara." Ia au i te buka *Rapaauraa i te tau tahito e te ma'i* (Beretane), i te matahiti 500 e tae atu 1500, "ua tiaturi vetahi taata e na te Atua e faaohipa i te mau ma'i no te faautua i te taata no ta ratou mau hara." I te senekele 14, ua pohe e mirioni taata i Europa no te hoê ma'i. Te auraa ia e ua haapohe te Atua ia ratou no to ratou ino? Aore ra na te hoê bateria ino i faatupu i tera ma'i, mai ta te mau taote i parau? E ui paha vetahi: Te faaohipa iho â ra anei te Atua i te ma'i no te haamauiui i te taata no ta ratou mau hara?*

* Noa 'tu i te hoê tau i tahito ra, ua faautua te Atua i te taata no te mau hara taa maitai, aita te Bibilia e faaite ra e te faaohipa ra Iehova i te ma'i aore ra te ati no te faautua i te taata no ta ratou mau hara.

A FERURI NA: No te aha Iesu i faaora 'i i te feia ma'i mai te peu ua riro te ma'i e te mauui ei faautuaraa tano no ô mai i te Atua? Aita anei te reira e haafaufaa ore ra i to te Atua parau-tia? (Mataio 4:23, 24) Aita roa 'tu Iesu e ohipa no te patoi i te Atua. Ua parau oia: "E rave noa vau i te mau mea atoa e mauruuru ai o 'na" e "te rave nei au i ta te Metua i faaue mai."—Ioane 8:29; 14:31.

Mea papu maitai te Bibilia: mea "ino ore" te Atua ra o Iehova. (Deuteronomi 32:4) Ei hi'oraa, aita roa 'tu te Atua e faatopa i te manureva a pohe ai e rave rahi taata hapa ore no te mea te hinaaro ra oia e faautua i te hoê noa taata i roto i te manureva! No nia i to te Atua parau-tia, ua parau o Aberahama, te hoê tavini taiva ore a te Atua, e e ore te Atua "e haamou . . . i te feia parau-tia, e te paieti ore." Ua na ô atoa oia: "Eiaha roa hoi oe e na reira." (Genese 18:23, 25) Te faataa atoa ra te Bibilia: "E ore mau te Atua e rave i te parau ino."—Ioba 34:10-12.

TA TE BIBILIA E HAAPII MAI RA NO NIA I TE MAUIUI

Ia mauui tatou, e ere no te mea te faautua ra te Atua ia tatou no te hoê hara taa maitai. Ua haapapu Iesu i te reira a farerei ai oia e ta 'na mau pīpī i te hoê taata tei fanau-matapo-hia. "Ui maira ta 'na mau pīpī ia 'na: 'Rabi, o vai tei hara, teie taata aore ra to 'na na metua, i fanau-matapo-hia mai ai oia?' Pahono atura Iesu: 'Aita teie taata i hara, aita atoa to 'na na metua, na roto rā ia 'na e itehia 'i te mau ohipa a te Atua.'"—Ioane 9:1-3.

E mau mana'o hape te reira matauhia i tera tau. Papu maitai ua maere te mau pīpī a Iesu a parau ai oia aita roa 'tu tera taata i matapohia no te mea ua

hara oia aore ra to 'na na metua. Ua faaora Iesu i tera taata matapo e ua haapapu oia mea tano ore ia mana'o e faautuaraa te mauui no ô mai i te

Te haapapu mai ra te Bibilia

- “Eita hoi te Atua e hema i te mau mea iino, eita atoa oia iho e faahema i te taata.” (IAKOBO 1:13) Oia mau, fatata roa “te mau mea iino” o te haamauiui nei i te hui-taata ehia matahiti i teie nei i te faaorehia, mai te ma'i, te mauui e te pohe.
- “Faaora 'tura [Iesu Mesia] i te feia ma'i atoa.” (MATAIO 8:16) Ma te faaora i te feia atoa tei haere e farerei ia 'na, ua faaite te Tamaiti a te Atua i ta te Faatereraa arii a te Atua e rave no te taatoaraa.
- “E tamärô [te Atua] i te mau roimata atoa o to ratou mata. E ore roa te pohe, e ore atoa te oto e te auê e te mauui. Ua mou hoi te mau mea tahito.”—APOKALUPO 21:3-5.

No te aha Iesu e faaora 'i i te feia ma'i mai te peu e faautuaraa te reira no ô mai i te Atua no to ratou ino?

Atua. (Ioane 9:6, 7) I teie mahana, e tamahanahanahia te feia atoa e mauui nei no te ma'i ino mau a ite ai e ere te reira no ô mai i te Atua.

O VAI IA TE TANO IA FAAHAPAHIA?

No te aha ia te faaruru ra te hui-taata e rave rahi mauui? Te ui ra te taata i teie uiraa a hanere matahiti i teie nei. Mai te peu e ere te reira no ô mai i te Atua, o vai te tano ia faahapahia? E pahonohia teie mau uiraa i to muri nei tumu parau.



O vai te tano ia faahapahia no te mau mauui atoa?

Mai te peu e ere te mauui no ô mai i te Atua, no te aha te rahi noa 'tu ra te o'e, te veve, te tama'i, te ma'i e te ati natura? Te faaite ra te Parau a te Atua e toru tumu no to te huitaata mauui:

1. Te miimii, te nounou e te feii. “Ta te taata nei faaheporaa 'tu i te taata e pohe atura ei pohe no 'na iho.” (Kohēleta 8:9) Te tamau nei te mau taata i te mauui no te mea te faaruru ra ratou i te huru taata tia ore, te miimii e te ino rahi o te mau taata.

2. Te tau e te mau tupuraa taue. E tamau te taata i te mauui no te mea “e tau râ e te tiaia noa to te taata atoa ra.” (Kohēleta 9:11) E mauui te taata no te mau tupuraa mana'o-ore-hia, no te mau ati e tupu taue mai aore ra mea haapao ore te taata e te hape ra ratou.

3. Te arii ino o teie nei ao. Te haapapu maitai ra te Bibilia no te aha te mauui nei te taata. Te na ô ra: “Te vai nei râ to te ao atoa i raro a'e i te mana o te varua ino.” (Ioane 1, 5:19) “Te varua ino,” o Satani ia te Diabolo. E varua puai mau. I na mua 'tu, e melahi oia a te Atua, “aita [râ] oia i mau papu i roto i te parau mau.” (Ioane 8:44) Ua apiti te tahi atu mau melahi ia Satani e ua orure hau ratou i te Atua no te haamâha i to ratou mau hinaaro miimii, a riro atu ai ei demoni. (Genese 6:1-5) Mai te orureraa hau mai â, te haa nei o Satani e ta 'na mau demoni ma te puai e te ino i roto te mau ohipa a teie nei ao. O ta ratou iho â râ e rave nei i to tatou nei tau. I teie mahana, e riri rahi to te Diabolo e “te haavare nei i to te ao atoa nei” e “ua ati . . . to te fenua.” (Apokalupo 12:9, 12) Papu maitai, e faatere ino mau o Satani. Mea au roa na 'na ia mauui te taata. O Satani te tumu o te mau mauui atoa, e ere o te Atua.

A FERURI NA: O te hoê faatere ino e te aroha ore ana'e te nehenehe e haamauui i te feia hapa ore.

Taa ê roa 'tu i te reira, te parau ra te Bibilia: “E here te Atua.” (Ioane 1, 4:8) Mai te reira iho â te Atua. Oia hoi, “eiaha roa te parau ino ra e hurihia 'tu i te Atua! eiaha roa te Puaihope ia parauhia i te rave parau ino ra!”—Ioba 34:10.

Tera râ, e ui paha oe: “Afea te Atua Mana hope e faaore ai i te faatereraa ino mau a Satani?” Mai ta tatou i ite na, mea riri na te Atua te ino e te mauui nei oia a ite ai i to tatou oto rahi. Hau atu, ta haapapu ra ta 'na Parau: “A huri . . . i to outou mau ahoaho atoa i nia ia 'na, no te mea te tâu'a mai ra oia ia outou.” (Petero 1, 5:7) Te here ra te Atua ia tatou e e puai rahi to 'na no te faaore roa i te mauui e te mau ohipa parau-tia ore, mai ta to muri nei tumu parau e faataa mai.*

* No te ite atu â no te aha te mauui i rahi roa 'i, a hi'o i te haapiiraa 26 o te buka *Ia ora oe e a muri noa 'tu!* pihia e te mau Ite no lehova. E nehenehe oe e rave mai i tera buka i nia www.jw.org/ty.



Fatata te Atua i te faaore roa i te mau mauui atoa

“Te maoro, e Iehova, o ta ’u tiaororaa, e aore oe i faaroo mai! te maoro o ta ’u pii-hua-raa ’tu ia oe, e hamani ino teie e vai nei, e aita oe i faaora!” (Habakuka 1:2, 3) O te mau parau ia a Habakuka teie. E taata maitai oia tei fana’o i te farii maitai a te Atua. Te faaite ra anei ta ’na mau parau e ua ere oia i te faaroo? Aita roa ’tu! Ua tamahanahana te Atua ia Habakuka ma te parau atu ua faataa Oia i te taima e faaore roa oia i te mauui.—Habakuka 2:2, 3.

Ia mauui oe aore ra hoê taata herehia, mea ohie roa ia parau e mea taere roa te Atua aore ra e titauhia ia haa oia i teie nei. Tera râ, te haapapu ra te Bibilia: “E ere Iehova i te mea taere i te faatupu i ta ’na parau fafau mai ta vetahi e mana’o ra, mea faaoromai râ oia ia outou, no te mea aita oia e hinaaro ra ia haamouhia te hoê, te hinaaro nei râ ia noaa i te taata atoa te tatarahapa.”—Petero 2, 3:9.

AFEA TE ATUA E HAA ’I?

Fatata roa! Ua parau Iesu e ite te hoê u’i taa maitai i e rave rahi tupuraa o te faaite i te mau mahana hopea o “te faanahonahoraa o te ao nei.” (Mataio 24:3-42) Te tupu ra ta Iesu i tohu i teie mahana. Papu maitai ia fatata roa te Atua i te haapao i te mau ohipa a te taata.*

E nafea râ te Atua e faaore roa ’i i te mau mauui atoa? A ora ’i i nia i te fenua, ua faaite Iesu i to te Atua puai no te tamahanahana i te huitaata o te mauui ra. Teie te tahi mau hi’oraa.

Te mau ati natura: A tere ai na nia i te pahi i te miti no Galilea, ua faaruru Iesu e ta ’na mau aposetolo i te hoê vero puai o tei nehenehe e faataahuri i to ratou pahi. Ua faaite râ Iesu e mana to ’na e to to ’na Metua i nia i te mau puai natura. (Kolosa 1:15, 16) Ua parau noa Iesu: “A faaea! Mamû!” Eaha tei

* No te ite atu â no nia i te mau mahana hopea, a hi’o i te haapiiraa 32 o te buka *la ora oe e a muri noa ’tu!* piahia e te mau Ite no Iehova e ta oe e nehenehe e rave mai ma te tamoni ore i nia www.jw.org/ty.

tupu? “Pohe ihora te mata’i e mania roa ’tura.” —Mareko 4:35-39.

Te ma’i: Ua ite-maitai-hia e e mana to Iesu no te faaora i te matapo e te pirioi. Oia atoa i te taata tei roohia i te ma’i hopii, te lepera aore ra te tahi atu ma’i. “Faaora ’tura [oia] i te feia ma’i **atoa.**” —Mataio 4:23, 24; 8:16; 11:2-5.

Te o’ē: Ua faaohipa Iesu i te puai ta to ’na Metua i horoa ’tu no te faarahi mai i te maa. Te parau ra te Bibilia ua horoa oia i te maa na e tausani taata e piti taima i roto i ta ’na taviniraa.—Mataio 14:14-21; 15:32-38.

Te pohe: Mea papu maitai e mana to Iehova no te faaore roa i te pohe inaha ua faaora Iesu i te taata mai te pohe mai e toru taima. Ua pohe hoê o ratou e maha mahana i te maoro e ua faatia faahou mai Iesu ia ’na.—Mareko 5:35-42; Luka 7:11-16; Ioane 11:3-44.



E FAUFAAHIA OE A ITE AI E TE TÂU'A RA TE ATUA IA OE

Ua poiete te Atua i to tatou tino ia nehenehe te reira e rapaau ia 'na iho. Ia mutu, ia pahure aore ra ia puta te tino o te hoê taata ea maitai, e “faanaho te tino e rave rahi ohipa faahiahia mau no te rapaau i te pepe iti anei aore ra rahi.” (Johns Hopkins Medicine) Oioi te tino i te haa ia faaea te toto i te tahe, ia rapaauhia te pepe e ia paari mai te vae-haa o te tino.

A FERURI NA: Inaha ua poiete te Atua i to tatou tino ia nehenehe te reira e rapaau i te pepe, mea papu e tauturu oia ia tatou ia tamärû i to tatou aau, e ere anei? Ua parau te papai salamo: “Ua rapaau oia i te feia aau paruparu ra e ua taamu i to ratou mau puta.” (Salamo 147:3) Te mauui ra anei oe no te hoê ohipa tei tupu aore ra ta oe e faaruru ra? E nafea ia oe e papu ai e taamu Iehova i to oe mau puta i teie nei e a muri a'e?

TA TE BIBILIA E HAAPII MAI RA NO NIA I TE HERE O TE ATUA

Ua fafau te Atua: “Eiaha e mäta'u, tei pihai-atoa-iho vau ia oe; eiaha e taiâ, o vau hoi to Atua. E faaetaeta vau ia oe, e tauturu vau ia oe.” (Isaia 41:10) Ia ite te hoê taata e te tâu'a ra Iehova ia 'na, eita oia e hepohepo faahou e e fana'o oia i te puai no te faaruru e rave rau fifi. Ia au i te aposetolo Paulo, e fana'o oia i “te hau o te Atua, tei hau ê i te mau mana'o atoa.” Ua parau atoa oia: “E puai to 'u ia faaruru i te mau mea atoa maoti tei horoa mai i te puai.”—Philipi 4:4-7, 9, 13.

Maoti te Bibilia, e puai mai to tatou faaroo i roto i te mau parau fafau a Iehova no te a muri a'e o te huitaata. Ei hi'oraa, te faaite ra te Apokalupo 21: 4, 5 (faahitihia i to muri nei api) ia tatou **eaha** ta 'na e rave e **no te aha** e nehenehe tatou e tiaturiri e:

- “E tamärô oia i te mau roimata atoa” o to te taa-ta mata. E faaore roa Iehova i te mau mauui e haa-

peapearaa atoa, noa 'tu e te haafaufaa ore ra vetahi ê i te reira.

- ‘A parahi ai i nia i te terono’ hanahana i te ra'i, e faaohipa te Arii Mana hope i to 'na puai e to 'na mana no te faaore roa i te mauui e no te horoa mai i te tauturu hinaarohia.

- “E parau papu hoi teie e te parau mau.” Na Iehova e haapapu ra i te reira. O 'na hoi te Atua mau o te faatupu iho â i ta 'na mau parau fafau.

Maoti te ao nui e te Bibilia, e ite tatou i te huru mau e te mau huru maitatai o to tatou Metua i te ra'i. Maoti te mau poieteraa, te ite ra tatou e te hinaaro ra te Atua ia riro tatou ei hoa piri no 'na. Mea papu atu â teie mana'o maoti te Bibilia o te na ô ra: “A faafatata 'tu i te Atua, e e faafatata mai oia ia outou.” (Iakobo 4:8) Te parau ra te Ohipa 17:27: “Aita hoi oia i atea ia tatou tataitahi.”

A rave i te taima no te ite o vai mau â te Atua. E papu atu â ia oe “te tâu'a mai ra oia ia [oe].” (Petro 1, 5:7) Eaha te mau haamaitairaa ta oe e ite a tiaturi ai ia Iehova?

A hi'o na ia Toru no te fenua Tapone. Ua paari oia e te hoê metua vahine Kerisetiano. Ua ô râ oia i roto i te pŭpŭ taata ino mau o te mafia Tapone, oia hoi te mau *yakuza*. Te faatia ra oia: “Ua tiaturi au e ua riri te Atua ia 'u. No 'u, a pohe ai te feia atoa ta 'u i matau, te feia herehia iho â râ, ua hinaaro te Atua e faautua ia 'u.” Ua farii Toru e ua riro oia “ei taata aroha ore e te ino mau” no te mea ua pee oia i te ohipa e te huru o tera pŭpŭ taata taparahi taata. No te riro ei taata tuiroo, te haamana'o ra oia: “Ua hinaaro vau e pohe i to 'u apŭraa i muri a'e i te haapoheraa i te hoê taata tuiroo a'e ia 'u.”

Tera râ, ua haapii oia e ta 'na vahine, o Hannah, i te Bibilia. Ua taui roa o Toru i to 'na huru oraraa



e feruriraa. Te parau ra o Hannah: “Ua ite maitai au i te mau tauraa ta ta ’u tane i rave.” I teie nei, te parau ra o Toru ma te papu: “Te vai ra te hoê Atua o te tâu’a mau ra ia tatou taitahi. Aita oia e hinaaro ia pohe hoê noa ’e taata. Te hinaaro ra oia ia faaore roa i te hara o te feia tei tatarahapa ma te aau tae. Te faaroo ra oia i ta tatou e faaite ia ’na, noa ’tu e mau parau aita tatou i faaite a’e i te tahi atu aore ra ta vetahi ê e ore e taa. Fatata Iehova i te faaore roa i te mau fifi, te oto e te mau iui rahi. I teie nei â, te tauturu ra oia ia tatou ma te faaohi-pa i te mau ravea ta tatou i ore i mana’o a’enei. Te tâu’a mau ra oia ia tatou e te tauturu mai oia ia paruparu tatou.”—Salamo 136:23.

Te faaite ra te hi’oraa o Toru e mea faufaa ia ite e nehenehe te Atua e faaore i te mau fifi atoa e e tamârô i te mau roimata atoa. Fatata roa oia i te na reira. Te haapapu ra te reira e a muri a’e maitai to tatou e te tauturu mai ra te Atua ia fana’o tatou i te hoê oraraa maitai a’e i teie nei. Oia mau, noa ’tu ua î roa te fenua i te mau iui, te tâu’a ra te Atua ia oe ma te here e e faufaahia oe i te reira.

“E tamârô oia i te mau roima-ta atoa o to ratou mata. E ore roa te pohe, e ore atoa te oto e te auê e te mau iui. Ua mou hoi te mau mea tahi-to. Parau atura te Atua o te parahi ra i nia i te terono: ‘Inaha, te hamani nei au i te mau mea apî atoa.’ Na ô atoa maira oia: ‘A papai, e parau papu hoi teie e te parau mau.’”—Apokalupo 21:4, 5.



Eaha to te Atua huru a mau i ai oe?

Te mana’o ra vetahi e aita te Atua e ite ra i to tatou mau i ai aore ra e tâu’a ra i te reira.

A HI’O NA I TA TE BIBILIA E PARAU RA

■ Te ite e te tâu’a ra te Atua ia oe

“Ite a’era lehova, e ino rahi to te taata o te ao nei, . . . ooo roa a’era tana aau.”

—Genese 6:5, 6.

■ E faaore roa te Atua i te mau mau i ai atoa

“No parahirahi a’e te paieti ore, e aita ra; oia â ïa, e hi’o â oe i to ’na vahi, e aita nei. Area te feia mārû ra, e parahi ïa i te fenua, e oaoa ratou i te rahi o te hau ra.”

—Salamo 37:10, 11.

■ Ta te Atua e hinaaro ra no oe

“Ua ite hoi au i te opua ta ’u i opua ia outou nei, te parau maira lehova. E opuaraa hau ïa, e ere i to te ino; ia horoa ’tu vau i ta outou i tia-turi ra, i to outou hopea. E riro outou i te tiaoro mai ia ’u, e haere hoi outou e pure mai ia ’u, e na ’u e faaroo atu ia outou.”

—Ieremia 29:11, 12.

“A faafatata ’tu i te Atua, e e faafatata mai oia ia outou.”—Iakobo 4:8.



A HAPONO MAI NA HOË BUKA

la ora oe e a muri noa 'tu!

No te ite atu â no nia i te tumu e faatia ’i te Atua i te mau i ai, a hi’o na i te haapiiraa 26 o teie buka piahia e te mau lte no lehova

Te vai atoa ra i nia www.jw.org/ty

REO _____

I’OA _____

VAHI NOHORAA _____

A hi’o i te api 2 no te papai mai



Mea tamoni ore ia rave mai i teie vea e tei matara ê na



Bibilia na roto hau atu i te 150 reo

A hi’o na i nia www.jw.org/ty aore ra a faaohipa i teie hoho’a



wp18.3-TH
210908